

I FLETUDHËZUES I PAKETIMIT:
Informacion për pacientin

GENTAKOL

Tretësirë me pika për sy – 0.3% (Gentamicinë sulfat)

Lexojeni me kujdes këtë fletudhëzues përpara se të filloni përdorimin e barit.

- Ruajeni këtë fletudhëzues. Mund të keni nevojë ta lexoni përsëri.
- Në qoftë se keni pyetje të mëtejshme, pyesni mjekun ose farmacistin tuaj.
- Ky bar është përshkruar për ju. Mos e jepni tek persona të tjerë. Mund t'i dëmtojë ata edhe pse mund të kenë të njëjtat simptoma si ju.
- Në qoftë se ndonjë prej efekteve anësore përkeqësohet ose në qoftë se vëreni ndonjë efekt tjetër anësor, që nuk përmendet në këtë fletudhëzues, ju lutemi të njoftoni mjekun ose farmacistin tuaj.

Në këtë fletudhëzues:

1. Çfarë është Gentakol dhe përse përdoret
2. Përpara se të përdorni Gentakol
3. Si ta përdorni Gentakol
4. Efekte anësore të mundshme
5. Si ta ruani Gentakol
6. Informacion i mëtejshëm

1. ÇFARË ËSHTË GENTAKOL DHE PËRSE PËRDORET

Gentakol është një produkt farmaceutik, që përmban lëndën aktive gentamicinë sulfat. Gentamicina është një antibiotik aminoglikozidik, veçanërisht aktiv kundër bacileve aerobe gram-negativë, sidomos *Escherichia coli*, *Proteus*, *Klebsiella*, *Serratia*, *Enterobacter* dhe *Citrobacter*. Gentamicina nuk vepron kundër baktereve anaerobë. Tretësira me pika për sy Gentakol përdoret për mjekimin e infeksioneve bakteriale të syrit të shkaktuara nga mikroorganizma gram-pozitivë dhe gram-negativë si: konjunktiviti infektiv, keratiti, blefariti. Përdoret edhe për profilaksi para dhe pas kirurgjisë.

2. PËRPARA SE TË PËRDORNI GENTAKOL

Mos përdorni Gentakol:

- në qoftë se jeni i ndjeshëm (alergjik) ndaj aminoglikozidëve ku bën pjesë gentamicina ose ndaj lëndëve ndihmëse të barit pasi mund të shfaqen reaksione alergjike, përfshirë dhe anafilaksinë. Reaksionet alergjike të shkaktuara nga aminoglikozidët nuk janë të zakonshme, por, kur ndodhin, shpesh janë të kryqëzuara brenda grupit kimik.

Tregoni kujdes të veçantë me Gentakol

- Pyesni mjekun tuaj përpara se të përdorni Gentakol.
- Në qoftë se gjatë trajtimit me Gentakol nuk keni lehtësim të simptomave, bëni një ekzaminim baktereologjik dhe një test të rezistencës ndaj gentamicinës. Në këto raste, si dhe në rast se shfaqet irritim apo mbindjeshmëri ndaj ndonjërit prej përbërësve të preparatit, duhet ndaluar trajtimi me Gentakol dhe të merren masa të tjera të përshtatshme.
 - Hiqni lentet e kontaktit dhe zëvendësojini ato me syze gjatë trajtimit të infeksioneve të syrit.
 - Si të gjithë antibiotikët e tjerë, shmangni trajtimin për një kohë të gjatë, sepse mund të shkaktojë shumimin e baktereve rezistente.
 - Mos vazhdoni përdorimin e Gentakol në rast të shfaqjes të një infeksioni tjetër, por zëvendësojeni atë me një trajtim tjetër të përshtatshëm.
 - Shmangni përdorimin me qëllim parandalues të pajustificuar të Gentakol, në mënyrë që të mos shfaqet fenomeni i rezistencës.

Marrja e barnave të tjera

Ju lutemi të kontaktoni me mjekun ose farmacistin tuaj në qoftë se jeni duke marrë / përdorur ose keni marrë / përdorur kohët e fundit barna të tjera, përfshirë ato të marra pa recetë. Mos harroni të informoni mjekun tuaj për trajtimin me Gentakol, në qoftë se ju jepet ndonjë bar tjetër gjatë trajtimit. Ndërveprimet medikamentoze klinikisht të rëndësishme vërehen pas përthithjes sistemike të Gentakol. Përdorimi i barnave të tjerë si: kanamicinë, neomicinë, streptomycinë, ciklosporinë, aciklovir, polimiksinë B, kolistinë, vankomicinë, cisplatinë, cefalosporinat, amfotericin dhe fludarabinë shton rrezikun e nefrotoksicitetit. Duhet mënjnauar përdorimi i njëkohshëm i gentamicinës me barna të tjerë ototoksikë siç janë acidi etakrinik dhe ndoshta furosemidi sepse mund të rrisin toksicitetin e aminoglikozidëve si dhe përdorimi i njëkohshëm me relaksues të muskujve të tipit të kurareve.

Shtatzënia dhe ushqyerja me gj

Kërkonti këshillën e farmacistit ose të mjekut përpara se të përdorni këtë bar. Siguria e përdorimit të këtij bari në shtatzëni dhe laktacion nuk është vërtetuar ende. Megjithatë duhet të evitohet përdorimi i këtij bari si gjatë shtatzënisë dhe gjatë ushqyerjes me gj.

Drejtimi i automjetit dhe përdorimi i makinerive

Në raste të rralla pacienti mund të ankohet për ndjesi djegieje ose shpimi në sy, si dhe të ketë çrregullime të shikimit. Në këto raste nuk lejohet drejtimi i automjetit dhe përdorimi i makinerive.

Informacion i rëndësishëm për disa nga lëndët ndihmëse të Gentakol

Ky bar përmban 1 mg klorur benzalkoni / flakon 10 ml. Kloruri i benzalkonit mund të përthithet nga lentet e buta të kontaktit dhe mund të ndryshojë ngjyrën e tyre. Ju duhet t'i hiqni lentet përpara se ta përdorni këtë bar dhe t'i vendosni përsëri pas 15 minutash. Kloruri i benzalkonit mund të shkaktojë irritim të syrit, sidomos në qoftë se keni sy të thatë ose çrregullime të kornesë (shtresa transparente e përparme e syrit). Në qoftë se keni ndjesi jonormale të syrit, djegie ose dhimbje pas përdorimit të këtij bari, njoftoni mjekun tuaj.

3. SI TA PËRDORNI GENTAKOL

Gjithmonë përdoreni Gentakol sipas këshillës së mjekut tuaj. Në qoftë se nuk jeni i sigurt, kontaktoni me mjekun ose farmacistin. Në qoftë se ndjeni që efektet e Gentakol janë shumë të forta ose shumë të dobëta, flisni me mjekun ose farmacistin tuaj.

Gentakol përdoret lokalisht në sy në të rritur dhe fëmijë. Në infeksionet e lehta dhe të mesme pikohen 1-2 pika në syrin e sëmurë çdo 4 orë (deri në 6 herë në ditë). Në infeksionet e rënda duhet të pikohen 2 pika çdo orë.

Mënyra e administrimit

- Lajini mirë duart.
- Mos e prekni vendin e daljes së pikave.
- Shikoni lart.
- Ulni kapakun e poshtëm të syrit për të krijuar një ulluk.
- Vendosni pikatoren sa më afër ullukut, por pa e prekur atë.
- Hidhni sasinë e duhur të pikave në ulluk.
- Mbyllni syrin për rreth 2 minuta.
- Tretësira e tepërt që del mund të hiqet me një garzë sterile.

Pikat në sy mund të shkaktojnë ndonjë ndjesi djegieje, por kjo ndjenjë nuk zgjat më shumë se disa minuta. Në të kundërt konsultohuni me mjekun ose farmacistin tuaj.

Në qoftë se keni përdorur më shumë Gentakol

Në qoftë se keni përdorur më shumë Gentakol, ose në qoftë se fëmijët e kanë marrë gabimisht këtë bar, ju lutemi të kontaktoni mjekun tuaj, spitalin, ose të telefononi urgjencën për të marrë një mendim për rrezikun dhe këshillë për veprimet që duhet të ndërmerren.

Në qoftë se harroni të përdorni Gentakol

Në qoftë se harroni të përdorni një dozë, përdorni dozën pasardhëse kur të jetë koha për përdorimin e zakonshëm të saj. Mos përdorni një dozë të dyfishtë për të plotësuar dozën e harruar. Në qoftë se keni pyetje të mëtejshme mbi përdorimin e këtij bari, pyesni mjekun ose farmacistin tuaj.

4. EFEKTE ANËSORE TË MUNDSHME

Si të gjithë barnat e tjerë, Gentakol mund të shkaktojë efekte anësore, megjithëse jo çdokush i manifeston. Pjesa më e madhe e efekteve anësore janë të lidhura me dozën dhe zhduken kur doza reduktohet ose trajtimi ndërpritet. Disa efekte anësore mund të ndodhin në fillim të trajtimit dhe zhduken në mënyrë spontane me vazhdimin e mjekimit. Efektet anësore më të zakonshme të Gentakol janë ato të mbindjeshmërisë, të cilat shfaqen me të kruara, skuqe, edemë lokale, mund të ndodhë vështirësi në frymëmarrje dhe fishkëllimë. Në rast se shfaqet reaksion mbindjeshmërie, trajtimi me Gentakol duhet të ndërpritet. Në raste të rralla pacienti mund të ankohet për ndjesi djegieje ose shpimi në sy, si dhe të ketë çrregullime të shikimit. Efekte anësore të tjera mund të përfshijnë:

- super-infeksion (infeksion i shkakuar pas një infeksioni të mëparshëm);
- probleme të funksionimit të veshkave.

Në qoftë se ndonjë prej efekteve anësore përkeqësohet, ose në qoftë se vëreni efekte anësore që nuk përmenden në këtë fletudhëzues, ju lutemi të lajmëroni mjekun ose farmacistin tuaj.

5. SI TA RUANI GENTAKOL

Ruajeni në një vend të thatë dhe të freskët në temperaturë jo më shumë se 25°C. Duhet të ruhet nga drita dhe lagështira. Mos e ruani në ngrirje. Mos e përdorni Gentakol pas datës së skadencës. Mbajeni barin në një vend të sigurt, ku fëmijët nuk mund ta marrin, sepse ai mund t'i dëmtojë ata.

6. INFORMACION I MËTEJSHËM

Çfarë përmbajnë pikat për sy Gentakol

Lënda aktive është gentamicinë sulfat. 1 ml tretësirë pika për sy përmban gentamicinë sulfat ekuivalent me 3 mg gentamicinë bazë (0.3 %). Lëndët ndihmëse janë: klorur benzalkoni, klorur natriumi, hidrogjen fosfat dinatriumi, dihidrogjen fosfat natriumi, ujë i pastruar dhe i sterilizuar.

Përmbajtja e paketimit

Kuti me 1 shishe plastike sterile 10 ml.

Mbajtësi i Autorizimit për Tregtim dhe Prodhuesi:

 **PROFARMA Sh.a.**
Rruga "Skënder Vila",
Tiranë, Shqipëri.
Tel.: +355 4 23 89 602

Ky fletudhëzues u rishikua për herë të fundit në Nëntor 2023.